

OSLOBODENJE

Objavljeno:05.04.2022.

EPBiH je oslonac građanstvu i privredi u BiH

Admir Anđelića: U toku rata smo ostali bez više od 50 posto proizvodnih kapaciteta

ALMIR BIČAKIĆ

Admir Anđelića, generalni direktor Elektroprivrede BiH, za naš list govori o ulozi EPBiH tokom agresije na BiH i s kojim se sve izazovima susretala u tom periodu, kao i trenutnom položaju kompanije i budućim projektima

ZA POČETAK DA SE PRISJETIMO KAKVA JE BILA ULOGA ELEKTROPRIVREDE BIH U RATU 1992-1996?

- Elektroprivreda Bosne i Hercegovine je u prethodnom ratu od 1992. do 1995. imala odlučujuću i presudnu ulogu kada je u pitanju snabdijevanje kupaca električnom energijom, odnosno stanovništva BiH u tom periodu. Podsjećam vas da smo iz naša tri proizvodna kapaciteta u TE Tuzla, u izuzetno teškim uslovima kakav je bio jedan ostrvski rad i stalno granatiranje pomenute TE, uspjeli obezbijediti potrebne, odnosno minimalne količine električne energije za kupce na teritoriji sjeveroistočne Bosne tuzlanskog bazena. Također, i TE Kakanj je u tom periodu uspjela obezbijediti određene količine električne energije za stanovništvo u SBK-u i ZDK-u, u to vrijeme srednje Bosne, a hidroelektrane na Neretvi, prije svega HE Jablanica putem dalekovoda i izgradnjom kabla S-35 i S-110, uspjela je da obezbijedi potrebne količine struje za grad Sarajevo. Ne treba posebno naglašavati šta je to značilo za Sarajevo u periodu kada su izgrađena ta dva kabla, kao i periodu prije toga kada je Sarajevo bilo bez električne energije, grijanja i osnovnih uslova za život. I zgrada u kojoj boravimo je također bila na prvoj liniji i potpuno je izgorjela, uništena, kao i većina naših kapaciteta.

ODBRANA BIH

S KAKVIM GUBICIMA JE ELEKTROPRIVREDA IZAŠLA IZ RATA I ZAPOČELA PUT KA JEDNOJ OD NAJPERSPEKTIVNIJIH BH. FIRMI KAKVA JE POSTALA DANAS?

- EPBiH je prije rata, od 1992. do 1995. poslovala na teritoriji čitave BiH. U toku rata smo ostali bez više od 50 posto proizvodnih kapaciteta, odnosno 50 posto korisnika naše mreže, sistema, također 80 posto mreže, kako prenosne, tako i distributivne i naravno bez ogromnog broja uposlenika koji su se na neki način, takoreći okrenuli prećim poslovima u tom periodu - odbrani BiH. Iz ovoga možemo reći da je EPBiH pretrpjela ogromne gubitke, od onoga dijela koji je bio pod kontrolom Armije BiH, a to je bilo jezgro buduće EPBiH, nažalost i taj dio je pretrpio značajne materijalne štete. Izašli smo iz rata potpuno devastirani, uništeni, ali evo s entuzijazmom i nadom da ćemo uspjeti da napravimo kompaniju koja će biti na ponos Bosanaca i Hercegovaca.

S KAKVIM SE IZAZOVIMA SVE SUSRETALA I ŠTA BISTE IZDVOJILI KAO NAJVEĆI USPJEH ELEKTROPRIVREDE BIH?

- Krajem rata, menadžment EP i ljudi koji su u to vrijeme njome upravljali shvatili su i bilo im je jasno da bez jake EP nema ni jake BiH. I upravo su to vremena kada se EPBiH okretala ka potpuno novom načinu upravljanja, ulaganja, investiranja. Najveći izazovi su u svakom slučaju upravo ti devastirani, kako kadrovski tako i infrastrukturni elementi kompanije i tome se najviše vremena i posvetilo. Došlo je do završetka kompanije, svi uposlenici koji su ostali bez posla u dijelovima kompanije, ko je ostao u Republici Srpskoj i Herceg-Bosni je bio

primljen u kompaniju i to dosta mladog kadra te '96, '97. i '98, tako da je stvoreno to jezgro, nukleus budućeg razvoja, odnosno potencijala. Također smo tada donijeli jednu vrlo važnu odluku, a to je da će se u EPBiH ugrađivati samo najbolji materijali, najbolja znanja i najbolji kvalitet i to je u suštini bio početak našeg vrlo dinamičnog razvoja. Ono sve što se iza toga desilo je u suštini plod i rezultat neke vizije i entuzijazma s početka. I dan-danas ubiremo plodove i na putu smo koji je trasiran još u tom periodu, tako da s ponosom možemo reći da smo mi, današnji uposlenici kompanije, ustvari nasljednici svega onoga što je bilo u proteklih 25 godina.

Najaktuelniji su priprema i razvoj projekata iz obnovljivih izvora električne energije / Senad Gubelić

PRIHVATLJIVE CIJENE

KAKVA JE DANAŠNJA POZICIJA ELEKTROPRIVREDE BIH?

- EPBiH je danas najveća elektroprivredna kompanija u BiH i bez lažne skromnosti najuspješnija kompanija. Ona je u svakom slučaju zamajac privrednog razvoja FBiH i BiH. Naša misija je da obezbijedimo potrebne količine električne energije, potrebnog kvaliteta i prihvatljive cijene i to je danas ono što nas vodi. Mislim da će EPBiH i ubuduće biti neko na koga će se moći osloniti građanstvo i privreda u BiH.

KOJI SU TRENUTNO NAJAKTUELNIJI PROJEKTI?

- Mi imamo prilično dinamičan investicioni ciklus u EPBiH i to je tako u posljednjih 25. godina. Uvijek se tu nešto dešava, tu je prije svega ulaganje u postojeće objekte, kako proizvodne, tako i distributivne, očuvanje, održavanje, produžavanje životnog vijeka i ono sve što čini jedan investicioni ciklus i opremu, kao i ostale elemente sistema. Ono što je trenutno najaktuelnije je taj ubrzani razvoj, tačnije priprema i razvoj projekata iz obnovljivih izvora električne energije. To su projekti iz vode, sunca, vjetra, a naravno ne želimo zaboraviti i naša postojeća postrojenja i proizvodnju iz uglja, a to je uvijek aktuelni Blok 7 u TE Tuzla i održavanje postojećih postrojenja kako bi im produžili životni vijek.

ZA BIH KAŽU DA JE ZEMLJA BOGATA HIDRO I VJETROPOTENCIJALIMA, IMAMO I VELIKU PROIZVODNJU UGLJA, MOŽEMO LI REĆI DA IMAMO DOVOLJNO STRUJE I NA RAZVOJU KOJIH POTENCIJALA (OBNOVLJIVI IZVORI ENERGIJE, VJETROELEKTRANE...) EPBIH RADI?

- Možemo reći da imamo potpuno dovoljnu količinu električne energije koja je potrebna za naš domaći konzum, a i viškove koje na neki način stavljamo na raspolaganje i drugim kupcima, kako u BiH, tako i izvan. Ono što može biti problem i o čemu stalno razmišljamo, na čemu radimo je taj naš proizvodni portfolio, ta potpuna dominantna ovisnost na proizvodnju iz uglja. To je i naša obaveza da u narednom periodu, naš proizvodni portfolio pomjerimo ka obnovljivim izvorima, iako opet ponavljam, ne zaboravljajući tu proizvodnju iz uglja. Mi moramo imati stabilan sistem, stabilnu proizvodnju i količinu električne energije koja će biti dovoljna za kupce s jedne strane, a s druge da na neki način obezbijedimo kontinuiran rad naših rudnika za neki period u budućnosti za koji će pretpostavljamo biti kraj proizvodnje iz uglja, odnosno proizvodnje električne energije iz uglja.

IZGRADNJA OBNOVLJIVIH IZVORA

KAKVE SU PROJEKCIJE ZA BUDUĆNOST, U KOJEM SMJERU ĆE SE DALJE EPBIH KRETATI, NA ČEMU ĆE BITI FOKUS?

- To je, prije svega, ispunjavanje obaveza koje je država BiH preuzela, diverzifikacija kompanije na način da ćemo u budućnosti vrlo brzo biti u obavezi da odvojimo mrežne aktivnosti, a tu, prije svega, mislim na distribuciju u posebnu kompaniju i sve ono što proizilazi iz toga. Sigurno će se morati razmisliti i o tarifnoj politici u EPBiH, a to je jedna od obaveza koje su preuzete potpisivanjem ugovora o osnivanju Energetske zajednice jugoistočne Evrope. Sigurno da ćemo naš fokus kada je u pitanju proizvodnja električne energije potpuno okrenuti ka obnovljivim izvorima i biti puno dinamičniji. Naravno, tu očekujemo i podršku svih nivoa vlasti na način da se određena zakonska rješenja izmijene kako bi ovaj proces bio puno lakši, ne samo za nas već i za sve investitore u BiH, kada je u pitanju izgradnja obnovljivih izvora. I to je u suštini ono u kojem smjeru će se EP u budućnosti postavljati. Vrlo bitna komponenta su i kadrovski resursi, jer se već susrećemo s određenim problemima jer naši najbolji, najperspektivniji kadrovi nalaze druga zaposlenja, poslodavce. Moramo promijeniti određenu politiku kada je u pitanju prijem uposlenika, nagrađivanje i sve ono što čini jednu brigu o njima. Kada govorimo o podršci svih nivoa vlasti, deklarativnu i javnu podršku imamo, nažalost ne mogu reći da postoje opstrukcije, prije ću reći da postoje neznanja. EP, ova energetska tranzicija u kojoj živi BiH i u kojoj je EP stub, nosilac te tranzicije su vrlo teški i bolni koraci. Mi gradimo objekte visoke tehnologije za koje su potrebne određene dozvole za koje smatramo da ipak, pogotovo u malim sredinama, ne postoji dovoljno znanja i stručnosti da mogu pratiti jedan takav krupan i veliki objekat kao što je recimo jedna solarna elektrana snage 40 MW ili vjetrolektrana snage 50 MW. To bih nazvao jednom vrstom nerazumijevanja. Naravno, EP uvijek stoji na dispoziciji da pomogne, da bude stručna podrška, da budemo i neko ko može na neki način izvršiti edukaciju uposlenih kadrova u opštinama. Nemali broj objekata koje gradimo su upravo naš pokušaj da pokažemo kako se jedan ozbiljan investitor odnosi i prema lokalnoj zajednici, ali i okolini. Pomenut ću i naš razvoj elektromobilnosti, što nije naš primarni biznis, ali smo kao najveća kompanija htjeli pokazati kako se ona razvija, da prije svega ukažemo da postoje problemi od prostornog planiranja, ishođenja dozvola i da postoji potreba za izmjenom određenih zakonskih rješenja.



Dnevni avaz

Objavljeno:06.04.2022.

BESPLATNO ZA KORISNIKE

Elektroprivreda BiH pokrenula aplikaciju: Brz i jednostavan pregled informacija

Dostupan je i uvid u potrošnju električne energije, pregled računa, načine plaćanja, brojeve žiro računa, kalkulator za procjenu iznosa mjesečnog računa...

[Elektroprivreda BiH je pokrenula mobilnu aplikaciju koja pruža brz i jednostavan pregled](#) informacija za kupce električne energije.

Ova besplatna aplikacija na siguran i praktičan način omogućava samostalno očitavanje i dostavu informacija o stanju na brojilu, prijavu kvarova i reklamacija, pregled statusa podnesenih zahtjeva.

Također, dostupan je i uvid u potrošnju električne energije, pregled računa, načine plaćanja, brojeve žiro računa, kalkulator za procjenu iznosa mjesečnog računa, a omogućena je dostava notifikacije o isteku roka za plaćanje računa, te druge korisne informacije.

Volume 0%

Kako se registrirati

Za registraciju mjernog mjesta u aplikaciji je dovoljan broj računa tj. referenca, te broj mjernog mjesta, a korisnik može izvršiti brisanje, ažuriranje podataka ili dodavanje više mjernih mjesta.

Putem mobilne aplikacije se može realizirati i registracija na usluge e-račun, e-planska te sms-stanje računa, dok automatska registracija usluge m-planska korisniku omogućava prijem push notifikacija na mobilne uređaje o planskim isključenjima za pridružena mjerna mjesta.

Besplatno instaliranje

Osim navedenog, korisnicima je na mobilnoj aplikaciji dostupan geografski prikaz lokacija poslovnica Elektrodistribucije, kao i geografski prikaz lokacija punionica za električne automobile u vlasništvu JP Elektroprivreda BiH.

Aplikacija se može koristiti na Android i iOS uređajima, a dostupna je za besplatno instaliranje na Google Play i AppStore, saopćeno je iz Službe za komunikacije JP Elektroprivreda BiH.

OSLOBODENJE

Objavljeno: 19.04.2022.

Hoće li rudnici na "zelenu granu": Elektroprivreda BiH na "remontu"?

Admir Anđelića: Uskoro ćemo naći rješenje za TTU Energetik

MIREN ALJIĆ

Otvaraju se nove kompanije unutar Elektroprivrede BiH, kao servis i usluge za potrebe rudnika, jer se TTU Energetik više ne uklapa u planove, kaže Anđelića

Plan restrukturiranja Elektroprivrede Bosne i Hercegovine podrazumijeva i osnivanje novih kompanija unutar grupacije, koje bi zbrinule višak radnika evidentiran kroz ovaj plan. EPBiH je već osnovao kompaniju u Kaknju koja će se baviti geoistraživanjima, ispitivanjem kvalitete uglja, zaštitom u rudnicima i drugim poslovima, koja bi trebala upošljavati 150 radnika iz rudnika i ostvarivati prihod kako na tržištu, tako i kroz pružanje usluga EPBiH.

SIGURNA KUPOVINA

Druga kompanija je MiOD d. o. o. Tuzla, koja bi trebala biti osnovana 26. aprila na Skupštini društva EPBiH, a čiji je puni naziv Mehanizacija i održavanje, što će biti i njena osnovna djelatnost. Kako za Oslobođenje kaže Admir Anđelića, generalni direktor EPBiH, na ovaj način se stvara zdravi dio Elektroprivrede, omogućava jednostavnije obavljanje usluga unutar EPBiH, ali i zbrinjava višak radnika, kojih sada prema procjenama ima oko 1.000.

- Mi već godinama imamo negativne izvještaje revizorskih kuća kada je riječ o nabavci mehanizacije u rudnike. U suštini, tu se navodi da je nabavka opreme rizično ulaganje, jer su rudnici već odavno stekli uslove za stečaj, što znači da će i oprema uskoro postati stečajna imovina. Osnivanjem ove kompanije omogućavamo sigurnu kupovinu pomoćne mehanizacije koja će pružati usluge sistemskog održavanja glavne opreme u rudnicima, ali i profitirati na tržištu. Mnoge od ovih poslova, računajući i poslove koje će raditi kompanija iz Kaknja, za nas su dosad radili drugi ili su to radili naši ljudi koje su angažovale druge firme. Tome više neće biti mjesta u EPBiH, ističe Anđelića.

Nova kompanija će biti u stopostotnom vlasništvu EPBiH, a imat će tri pogona - pogon održavanja Tuzla, pogon održavanja Kakanj i pogon mehanizacije. Sva tri pogona trebala bi upošljavati 326 radnika iz zavisnih društava rudnika koncerna. Planirana ulaganja u novo društvo kreću se oko 21 milion KM, a odnose se na nabavku nove i remont opreme u rudnicima, te ulaganja u početna obrtna sredstva. Procjena potencijalnog prihoda na godišnjem nivou iznosi 34 miliona KM, a planirana dobit je oko 2,6 miliona maraka.

TTU Energetik nije opravdao namjenu / Miren Aljić

Novo društvo mora minimalno 80 posto prosječnog prihoda ostvarivati unutar Koncerna EPBiH, da bi ostvarilo izuzeće od primjene Zakona o javnim nabavkama BiH, tako da je moguće planirati realizaciju do 20 posto prihoda na vanjskom tržištu.

Nove kompanije će obavljati poslove koje je za EPBiH trebao obavljati TTU Energetik, kompanija koju je EPBiH zajedno sa RMU Banovići u omjeru 80:20 kupila kroz stečaj tuzlanske kompanije TTU. Međutim, kako nam govori Anđelića, neodmjereno upravljanje kompanijom dovelo je do toga da EPBiH više ne računa na TTU Energetik.

LUTANJE NA TRŽIŠTU

- Nažalost, TTU Energetik se ne uklapa više u planove poslovanja EPBiH. On jeste bio zamišljen na način da predstavlja servis za EPBiH, praktično da radi što će sada raditi MiOD, ali zbog načina na koji je kompanija vođena, zbog neodmjerene politike rukovodstva i zbog lutanja na tržištu, mi više ne računamo na TTU Energetik. Uskoro ćemo naći rješenje i za tu kompaniju, dodaje Anđelića.

TTU Energetik je imao obavezu ostvarivati prihode unutar grupacije od 80 posto, a ostatak od 20 sa tržišta. Međutim, TTU Energetik je zbog 50 posto prihoda na tržištu ispao iz planova EPBiH, jer se sada na poslove Elektroprivrede BiH mora javljati putem tendera.